

2013-yil — Obod turmush yili

Elim deb, yurtim deb yonib yashash kerak!

Turkiston

1925-yildan chiqqan boshlagan

«Kamolot» yoshlar ijtimoiy harakati Markaziy Kengashining nashri

www.turkiston.uz

2013-yil 5-yanvar, shanba № 1 (15639)

2013-yil — Obod turmush yili

Янги йилда яхшиликлар бардавом

ЭЗГУ НИЯТЛАР МУШТАРАК

Янги йилни ўзгача кайфият билан қарши оламиз. Ёшимизга яна бир ёш қўшилиши, турли эртақ қаҳрамонларининг бизнинг ҳаёти-мизга «кириб келиши», бу билан айём янада завқли тус олиши, болаларнинг қувончи, кулгисидан олам янада мунаввар бўлиб кетиши билангина эмас, Янги йил энг юксак орзуларимиз сари бизни яна бир қадам яқинлаштириши билан ҳам бошқача суюмлидир.

Обод турмуш йилига қадам қўйдик. Айтишларича, инсоннинг инсонийлигини белгилайдиган муҳим омиллардан бири унинг нияти бўлар экан. Қизиқ, нахотки, одамзотнинг қандайлигини унинг ниятидан билиш мумкин? Мумкин экан. Фақат эзгу, савобли ишларни қиламан деган мақсад билан яшайдиган, яъни яхши ниятли кишиларнинг табиати ҳам соф, ўзлари яхшиликнинг энг баланд рутбасига эга чин инсонлар ҳисобланар эканлар. Юртимизда ҳар бир йилнинг ўзгача ном билан аталиши ҳам халқимизга хос яхши ниятлик, яхшиликпарварликнинг олий намунасидир, десак, муболаға бўлмайди. Чунки бу аниқ: насиб этса, ниятимизга яраша, бу йил ҳам мамлакатимизда худди ўтган йиллардаги каби улғувор ишлар амалга оширилади; Мустаҳкам оила йилида бунёд этилган оилалар янада мустаҳкамланиб, бу йил турмушлари янада обод бўлади; турмуши обод оилалар ҳиммат ва саховат камарини янада маҳкам боғлаб, бошқа оилаларнинг-да фаровон, тўқис турмуш кечиришларига кўмакдош бўлишади.

Президентимиз Ўзбекистон Республикаси Конституциясининг 20 йиллигига бағишланган тантанали маросимда 2013 йилни мамлакатимизда «Обод турмуш йили» деб эълон қилганида, бу эзгу номнинг инсонлар руҳиятига нақадар яқинлиги, юрагидаги сўз экани, таъбир жоиз бўлса, мамлакат билан халқ орзу-истакларининг нечоғлик муштарак эканини англадим.

Боботарих гувоҳ: не-не салтанатлар давлат ва халқнинг мақсадлари бошқа-бошқа бўлгани касофатидан таназзул ботқоғига учраган, қанча-қанча давлатлар нияти эл-улус ниятига номувофиқ келиши сабабидан йўқ бўлиб кетган. Яратганнинг ёрлақгани шудир: бугун бизнинг юртимизда эзгу ғоялар муштарак, ниятлар муштарак, мақсадлар муштарак. Фақат мақсад сари интилиш, савоб-ҳаракатда бўлиш, меҳнатдан қочмаслик талаб этилади, холос. Шу кунларнинг қадрига етиш, керак бўлса, бугунимизга шукр қилиб, эртаимизни бугунимиздан-да яхши бўлишига ҳаракат қилиш энг катта вазифаларимиздандир.

(Давоми 2-бетда)



Сардор Муллажонов фотоколлажи

«Мустаҳкам зиёли оила»

Тошкент вилоят давлат педагогика институтида «Камолот» ЁИХ бошланғич ташкилоти, хотин-қизлар кўмитаси ҳамда қасаба уюшмаси билан ҳамкорликда «Мустаҳкам зиёли оила» кўриктанлови ташкил қилинди.

Танловда институт ўқитувчилари: Мусабек Эшмуродов, Шокир Ўришов, Дилмурод Раҳматуллаев, Ботир Тожибоев ва

Бобур Неъматов ўз оила аъзолари билан иштирок этишди.

Улар учта шарт бўйича беллашдилар. Иштирок-

чилар бадий чикиш ва сахна кўринишларини намойиш этиб, оила мавзусида мақол ва ҳикматли сўзлар айтишди, оила формуласини ифодалашди. Мазкур танлов талабаларда ҳам ўзгача таассурот қолдирди.

Ҳакамлар ҳайъати хулосасига кўра, Ўришовлар оиласи биринчи ўринга лойиқ деб топил-

«Kamolot» loyihalari

ди. Иккинчи ўрин Раҳматуллаевлар ҳамда учинчи ўрин Эшмуродовлар оиласига насиб этди. Ғолибларга ташкилотчиларнинг совғалари топширилди.

Б.ҲАҚБЕРДИЕВ,
Тошкент вилоят давлат педагогика институти «Камолот» ЁИХ бошланғич ташкилоти етакчиси

Иштиёқ ва ташаббус уйғунлигида

Ташаббуснинг кучи иштиёқ, ҳаракат ва масъулиятда билинади. Бунда зукко, ғайратли ва ҳар жиҳатдан фаол бўлиш ҳам катта самара беради. Ушбу хислатлар мавжуд инсонда ажойиб ғоялар, тиниқ фикрлар уйғониши табиий. Агар мана шу жиҳатлар бутун бир жамоа аъзоларида шаклланган бўлса-чи? Унда, ҳеч шубҳасиз, марра доим уларники, деяверинг. Тошкент тиббиёт академиясининг Урганч филиали «Камолот» ЁИХ бошланғич ташкilotи кенгаши аъзолари ғайрат ва шижоат, ташаббускорлик бобида бир-биридан асло қолишмайди. Бир куч, ҳамжиҳатликда ишлаш уларнинг шioriга айланган.

— Ҳар ҳафта бошида кенгаш аъзолари ва факультет етакчилари иштирокида кичик йиғилиш ўтказамиз, — дейди «Камолот» ЁИХ Тошкент тиббиёт академиясининг Урганч филиали бошланғич ташкilotи етакчиси Зухроб Матмуродов. — Унда ўтган ҳафтадаги ишлар сарҳисоб қилиниб, келгуси режалар ишлаб чиқилади. Бизда ҳам ҳар ўқув йили бошида ўн ой давомидаги ишларнинг низом ва дастурлари ишлаб чиқилади.

Таълим муассасамизда 955 нафар «Камолот» аъзоси бор. Уларнинг эллик саккиз нафари муддатли ҳарбий хизматни ўтаб қайтган талабалардир. Шартнома асосида таълим олаётган ҳарбий талабаларга «Камолот» ЁИХ томонидан контракт пулининг ўттиз беш фоизи тўлаб келинапти.

Мана, яна бир йил ортда қолди. Сир эмаски, ҳар биримиз йил якунида ўз-ўзимизга, ўтган йилда нималар қилдим, қандай натижаларга эришдим, деган саволни берамиз. Қилган ишларимизни бирма-бир сарҳисоб қилиб оламиз. Таълим муассасамиздаги БТ аъзолари ҳам ўтган йилда кўпгина ишларга қўл уришди. Аиниқса, уларнинг баҳор ва ёз ойларида «Бунёдкор — 2012» талаба-

ёшлар меҳнат ҳаракатидаги ишлари таҳсинга лойиқ. Унда беш юз нафардан ортиқ талабаларимиз Урганч шаҳридаги ал-Хоразмий кўчасининг қайта таъмирланишига ўз ҳиссаларини қўшишди. Бугун кўча четидаги йўлаклар, бир-биридан кўркам арча, терак, чинор каби манзарали дарахтлар шаҳар кўркига янада кўрк қўшиб турибди. Бунда «Камолот»чиларнинг ҳам ҳиссаси бор.

Тошкент тиббиёт академияси Урганч филиалининг Ҳаракат аъзолари жиноятчилик, кашандалик, гиёҳвандлик каби салбий иллатларга қарши курашга оид қатор акциялар, давра суҳбатлари ҳамда тадбирлар ўтказиб келишяпти. «Ёшлар ва қонун», «Тамаки — инсон кушандаси», «Хуқуқий саводхонлик — давр талаби», «Гиёҳвандлик — умр заволи» мавзуларидаги тадбирларни қайд этиш зарур.

Президентимиз томонидан қабул қилинган «Мамлакатимизда демократик ислохотларни янада чуқурлаштириш ва фуқаролик жамиятини ривожлантириш концепцияси»нинг аҳамияти ёшлар учун жуда муҳим. Шу мақсадда «Камолот»чилар мазкур Концепция тарғиботи юзасидан жойларда тарғибот ва ташвиқот ишларини олиб боришди. Ушбу тарғибот тадбирларида



эллик нафар иқтидорли талаба қатнашди.

Тиббиётчилар билимга иштиёқманд инсонлар бўлишди. Бу бежиз эмас. Нега дейсизми? Чунки ушбу олий таълим муассасасининг талабалар тураржойларида ҳафтанинг ҳар жума куни «Заковат» интеллектуал ўйини ўтказилади.

— «Заковат» интеллектуал ўйинида биргина талабалар тураржойларида истиқомат қилаётган ёшлар эмас, балки академиянинг Урганч филиалида таҳсил олаётган кўплаб иқтидорли, изланувчан ҳамда зукко талабалар ўз билимларини синовдан ўтказишди, — дейди Зухроб Матмуродов.

Тошкент тиббиёт академияси Урганч филиалининг бошланғич ташкilotи қошида соғлом турмуш тарзини тарғиб этувчи йигирма кишидан иборат тарғибот гуруҳи шакллантирилган. Улар вилоятнинг барча мактаб, академик лицей

ва касб-ҳунар коллежларидаги «Камолот» ЁИХ бошланғич ташкilotларига ўз таклиф ва мулоҳазаларини беришади. Бу борада мавсум, об-ҳавонинг қай даражада экани ҳам эътиборга олинади.

— Чунки ҳаво ҳарорати болалар саломатлиги учун муҳим аҳамиятга эга, — таъкидлайди Зухроб Матмуродов. — Соғлом турмуш тарзини тарғиб этувчи мазкур гуруҳни ташкил этишдан асосий мақсадимиз ҳам ёшларни спортга кенг жалб этиш билан бирга, уларнинг саломатлигини эътиборга олишдан иборат.

Бугунги кунда Тошкент тиббиёт академияси Урганч филиалида даволаш иши, педиатрия иши, тиббий педагогика иши, олий ҳамширалик каби йўналишлар бўйича талабалар таҳсил олишмоқда. Уларнинг ўз соҳалари бўйича мавжуд билимлари етарли бўлиши талаб этилади, албатта. Чунки бизнинг сало-

матлигимиз мана шу ёш тиббиётчилар қўлида.

— Биз таҳсил олаётган олий таълим муассасида барча замонавий билимлар бериб борилади, — дейди Тошкент тиббиёт академияси Урганч филиали талабаси Барно Жўшқинова. — Амалий тажрибаларимизни ошириш учун турли дастгоҳлар, энг сўнги тиббиёт асбоб-ускуналаридан фойдаланамиз. Тенгдошларимиз бундай шартшароитларнинг яратилишида жонбозлик кўрсатаётган давлатимиз раҳбарига катта миннатдорлик билдиради.

Ҳа, юқорида келтирганимиздек, ташаббуснинг кучи нафақат иштиёқ, масъулият, балки зукколик ҳамда юксак билимда ҳамдир. Зеро, эртанги келажакни бугунги баркамол авлод вакиллари яратишади.

Акбарали ХУДОЙБЕРДИЕВ,
«Turkiston» муҳбири

Nigoh

Тенгдошларимиз ўртасида танлов-кўргазма

Тошкент Фотосуратлар уйда Ўзбекистон Бадий академияси, Камолиддин Бехзод номидаги миллий рассомлик ва дизайн институти, Ўзбекистон таълим, фан ва маданият ходимлари касаба уюшмаси, «Камолот» ЁИХ Марказий Кенгаши ҳамкорлигида «Биз — бунёдкор ёшлармиз, иллатларга қаршимиз!» деб номланган танлов-кўргазма ташкил этилди.

Унда Камолиддин Бехзод номидаги миллий рассомлик ва дизайн институти талабалари ўз ижодий ишлари билан қатнашди. Танловда намоёнига қўйилган асарлар графиканинг плакат санъатида яратилган бўлиб, ёш ижодкорлар асарлари орқали нафақат республикамиздаги, балки бутун дунёдаги глобал муаммоларни, атроф-муҳит, экология, Орол денгизи ва Оролбўйи муаммоларини, ичкиликбозлик, кашандалик каби аср вабосига айланиб келатган иллатларнинг олдини олишга қаратил-

ган мавзуларни ёритганлар. Ушбу танлов-кўргазмага ҳавола этилган ишларнинг инсонлардаги иллатларни бартараф этишга ундаш ғояси билан суғорилгани эътиборга лойиқдир. Хайъат аъзолари талабалар яратган ҳар бир ишни юқори баҳоладилар.

«Инсон ва табиат узвий боғлиқдир» деб номланган асар муаллифи Рухшона Шоалиева Гранприни қўлга киритди. «Энг яхши асар» номинацияси бўйича тақдирланган Юлдуз Қиличмуродова мазкур танлов ҳақида шундай дейди:

— Мен учун аёл, она тимсоли муқаддасдир. Соғлом онадан соғлом фарзанд дунёга келади. Танловнинг ташкил этилиши менга катта имконият яратди. Мен ана шу ғоямни томошабинлар диққатига ҳавола эта олганимдан бағоят хурсандман.

Иштирокчилар ҳомий ташкilotлар томонидан диплом ва қимматбаҳо совғалар билан тақдирланди.

Шоҳиста ОРТИҚОВА,
Камолиддин Бехзод номидаги миллий рассомлик ва дизайн институти талабаси

Sening tengdoshing



Шўҳрат Сувонов ҳам спортчи, ҳам шоир. У Низомий номидаги Тошкент давлат педагогика университетида ўқийди. Қўл жанги ва универсал жанг билан профессионал шугулланиб келмоқда. Ўзбек жанг санъати бўйича бир неча мартаба Ўзбекистон ва жаҳон чемпиони бўлган. Мураббий ва спорт устаси. Унинг «Онамнинг бағрига шошаман» номли шеърлар тўплами нашр этилган.

Санъатга ошуфта ёш диллар

Тошкент вилоятидаги мавжуд болалар мусиқа ва санъат мактаблари республикамиз миқёсида ўтказиб келинадиган деярли барча танлов ва фестивалларда энг кўп совринли ўринларга сазовор бўлиб келмоқда. Бу, албатта, қувонарлидир.



Вилоят миқёсида истеъдод гунчаларини кашф этишга, иқтидор эгаларини излаб топишга алоҳида эътибор қаратилаётган. Ҳозир вилоятдаги мавжуд 33 та мусиқа ва санъат мактабининг бутун диққат-эътибори ана шу йўналишга қаратилган.

Ўтган йили Ангрен шаҳридаги, Қуйи Чирчиқ ва Янгийўл туманларидаги мусиқа ва санъат мактаблари

капитал реконструкциядан чиқарилган бўлса, Пскент туманида янги мактаб фойдаланишга топширилди. Албатта, шунга яраша мусиқа ва санъат мактаблари зарур инвентарлар ҳамда замонавий жиҳозлар билан таъминланмоқда. Энг муҳими, жажжи иқтидор соҳибларининг камолоти учун барча шароитлар муҳайё.

Янги — 2013 йилда ҳам вилоятдаги болалар мусиқа ва санъат мактабларига бўлган эътибор яна давом эттирилади. Ушбу йилда Давлат дастурига биноан, Бўстонлиқ туманидаги 18-, Юқори Чирчиқ туманидаги 24- ҳамда Зангиота туманидаги 32-мактаблар учун янги бино қурилиши бошлаб юборилса, Бекободда-

ги 20- ва Қибрай туманидаги 26-болалар мусиқа ва санъат мактаблари капитал реконструкция қилинади.

— Янги йилдаги режаларимиз бундан-да катта, — дейди Тошкент вилояти мусиқа ва санъат мактабларини мувофиқлаштирувчи кенгаш раиси Азиза Полвонова. — Бизга кўрсатилаётган гамхўрлик ва эътибордан руҳланган ҳолда иқтидорли болалар билан ишлашни янада кучайтираемиз. Ҳар бир истеъдод гунчаси доимий эътиборимизда бўлади.

Дарҳақиқат, мамлакатимизда болалар мусиқасига, иқтидорли ёшларга алоҳида эътибор қаратилаётгани бор гап. Шундай экан, янги йилда ҳам вилоятдаги ёш иқтидорлиларга алоҳида эътибор қаратилиб, янги-янги истеъдодлар кашф этилаверади.

Ашурали БОЙМУРОДОВ,
«Turkiston» мухбири

Мавсум омадли бошланди

Ҳамюртимиз Денис Истомин Австралиянинг Брисбен шаҳрида теннис бўйича эркалар ўртасида ўтказилаётган АТП туркумидаги мусобақада муваффақиятли иштирок этмоқда.

Теннис мавсумини кўтаринки руҳда бошлаган Денис Истомин дастлаб турнирда 8-ракам остида сараланган словакиялик Мартин Клижанни ортиқча қийинчиликсиз 6-1, 6-2 ҳисобида мағлубиятга учратди.

Нимчорак финалда юртдошимиз мезбон теннисчи Ллейтон Хьюиттга қарши кортга чиқди. Ушбу учрашув-



да ҳам Денис Истомин зафар кучди ва чорак финал йўлланмасини қўлга киритди.

Ҳамюртимизнинг чорак финалдаги рақиби Энди Маррей (Буюк Британия)

— Жон Милман (Австралия) ўртасидаги учрашув якунига кўра маълум бўлади.

Фармонбек МАТНАЗАРОВ,
«Туркистон-пресс»

Шахс дахлсизлиги кафолати

Ҳуқуқий демократик давлат қуриш йўлидан бораётган мамлакатимизда фуқароларнинг ҳуқуқ ва эркинликлари, қонуний манфаатларини ҳуқуқий жиҳатдан кафолатлаш, шахс дахлсизлигини конституциявий жиҳатдан эътироф этиш асосий вазифалардан ҳисобланади. Жумладан, истиқлол йилларида шахс дахлсизлигини таъминлаш бўйича бир қатор ислохотлар амалга оширилди.

Қонунчилигимиз инсон манфаатларини таъминлашга қаратилган ҳуқуқий нормалар билан бойитилди. Адвокатура институтининг такомиллаштирилиши, одам савдосига қарши курашга қаратилган ҳуқуқий асоснинг пайдо бўлиши, бола ҳуқуқларини таъминлашга қаратилган қонунлар ва қонуности ҳужжатларнинг яратилаётгани шахс дахлсизлигини таъминлашга катта ёрдам беради.

Дахлсизлик деганда, ав-

вало, ҳар бир инсоннинг табиий ҳуқуқ ва эркинликлари дахлсизлиги назарда тутилади. Конституциямизнинг 19-моддасида: «Фуқароларнинг Конституция ва қонунларда мустақамлаб қўйилган ҳуқуқ ва эркинликлари дахлсиздир, улардан суд қарорисиз маҳрум этишга ёки уларни чеклаб қўйишга ҳеч ким ҳақли эмас», дейилган.

Шахс дахлсизлигига қарши хатти-ҳаракатлар оғир ҳуқуқбузарлик ҳисоб-

ланади. Инсон ҳуқуқлари ва эркинликлари тизимида инсоннинг шахсий дахлсизлик ҳуқуқи ўзига хос ўринга эга. Инсоннинг шахсий дахлсизлиги жиноят қонунчилиги ва бошқа муҳофаза чоралари назарда тутилган қонунлар билан ҳимоя қилинади.

Инсон шаъни ва қадр-қиммати фақат инсонга хос сифат бўлиб, у инсон туғилганидан қўлга киритадиган ажралмас ва бошқаларга ўтказиб бўлмайдиган ҳуқуқ ҳисобланади. Яъни маънавий дунёсини тавсифлайдиган номоддий бойликлардан биридир. Ривожланган мамлакатларда бўлгани каби юртимизда ҳам шахс дахлсизлигини таъминловчи қоидаларни фақат Конституцияда мустақамлаш билангина чеклаиб қолмай, жиноят

қонунчилиги, суд-ҳуқуқ соҳасини эркинлаштириш борасида босқичма-босқич ислохотлар ўтказилмоқда, аниқ тадбирлар амалга оширилмоқда.

Яна бир муҳим омил — шахс дахлсизлигини таъминлашда жамият аъзолари ҳуқуқий маданиятининг шаклланиши ҳам катта аҳамиятга эга. Ҳар бир шахс ўз ҳуқуқларини онгли равишда амалга оширишда қонунларни ҳурмат қилиши, атрофдагиларга нисбатан мажбуриятларини тўла хис этиши, ўзгаларнинг ҳақ-ҳуқуқларини эътироф этиши ҳам шахс дахлсизлигини таъминлашда катта аҳамиятга эга.

Феруза ФУЛОМОВА,
Учтепа туманидаги
8-давлат нотариал
идораси нотариуси



Кўза кунда эмас, кунда синади

Ирландиялик альпинист Килиманжаро чўққисини забт этиш вақтида ҳалок бўлди.

42 ёшли Иен Маккивер сайёрамизнинг еттита чўққисини забт этган альпинист эди. Шерикларининг сўзларига қараганда, чақмоқ қақиб, кучли жала қуяди. Натижада, улар гуруҳидаги тажрибали альпинистни чақмоқ уради. Иен кучли ёмғир ёғиши мумкинлигини, лекин бу унинг мақсади учун ҳалақит бермаслигини «Facebook»да таъкидлаган эди.

2008 йилда альпинист ўн ёшли мактаб ўқувчиси Шон Макшаррини Килиманжаро чўққисига олиб чиққан ва болакайнинг дунёдаги энг ёш альпинист номини олишига ёрдамлаган эди. Иен ўзи забт этган чўққилар ичида энг «осони» Килиманжаро эканини бот-бот таъкидларди.

Виждони қийналди

Вена шаҳрида бир неча кун олдин ўғирлаб кетилган, пони зотига мансуб от топилди.

Ўзгача кўринишга эга, бўйи бор-йўғи олтмиш сантиметрдан иборат, Фридолин лақабли от Вена шаҳридаги автобус бекатларидан бирида экани ҳақида хабар берилди. Энг қизиғи, хабарни отни ўғирлаган аёлнинг ўзи маълум қилган. Номаълум аёлнинг сўзларига қараганда, у отни касал қизи учун ўғирлаган, бироқ той-чоққа қарашни эплай олмагани сабабли қайтаришга мажбур бўлган. Аёл яна цирк маъмуриятдан узр сўраб, Фридолинга яхшироқ қарашларини илтимос қилган. Полиция айти пайтда бу аёл қидирувда эканини, топилса, албатта, жазоланишини айтган. Бироқ полиция фикрига қарши чиққанлар ҳам бўлди. Қайтарилган от учун онани жазолаш тўғриси, дейишмоқда улар.

Интернет-ғийбат

«Global Language Monitor» компанияси ҳар йилгидек 2012 йилда интернет саҳифаларида, электрон почталарда ва микроблогларда энг кўп ишлатилган сўзлар рейтингини тузиб чиқди.

Рўйхатни компания мутахассислари бир неча давлат миқёсида эмас, балки дунё бўйича тузди. Рейтингда Апокалипсис яъни «сўнгги кун» синонимидеги сўзлар биринчи ўринни эгаллади. Бу сўзлар 2012 йил 21 декабрга қадар шу даражада кўп ишлатилганки, натижа рекордга етган. Иккинчи ўринни эса, энг кўп ғийбат қилинган корейлик хонанда PSY эгаллаган. Бу хонанданинг рақси «YouTube» ижтимоий тармоғида ҳам энг кўп кўрилган видео бўлиб, рекорд натижани қайд этган эди. Шунингдек, рейтинг толибонларга қарши чиққан қизалоқ Малала Юсуфзай билан давом этган. Кўриб турибсиз, интернет фойдаланувчиларининг аксарият қисми нима билан машғул.

Интернет манбалари асосида
Жавоҳир КАРОМАТОВ
тайёрлади

